

Liklik nius long

prea,

givism na go

EBC Wok Misin

NIUSLETA NO. 69 MAS 2019

DIA OL PREN BILONG WOK MISIN!

Mipela i amamas long salim dispela niusleta No. 69 long yupela ol kongrigesen. Yupela ol misin diken i ken makim sampela bratasusa long ritim ol ripot long taim bilong lotu long Sande long 31 Mas, 2019. Ofa long dispela Sande i go long sapotim wok misin. Tenkyu tru long prea bilong yupela ol bratasusa i harim ol dispela ripot.

Adres bilong salim mani:

EBC Overseas Mission
BSP Goroka Branch
No. 1000 751 861

Ol Fild Adres:

Mike Kaire
EBC Community Service
P.O. Box 250, Dili, East Timor
Mobile: (00) 670 77757402
Email: mikekaire@gmail.com

Sifu Family

STT BMW Papua
Nabire 98802
HP: 0852-1357-0016/
0812-48620-831
Phone: (+628) 124 8620831
Email: sifuutina1@gmail.com

Missions Mobiliser

Muko Aveo
missions.mobiliser.ebc@gmail.com
Mobile: 72681881

Liklik nius long EBC Wok Misin

Design & Printing by:
EBC Publications Department, Lae

Dia ol bratasusa long wok misin,

Mipela i wisim yupela blessing bilong God antap tru long dispela yia 2019. Bel isi bilong Bikpela Jisas bai i stap wantaim yupela olgeta.

Tenkyu tru long yupela olgeta bratasusa i save tingim wok bilong God insait long Papua Niugini na ovasis tu.

Mi save amamas long yupela, long wanem, stat long nambawan de na i kam inap nau, yupela i bin poroman wantaim mipela long wok bilong autim gutnius. Na mi save pinis olsem, God yet i bin statim gutpela wok long yupela, na em bai i wok i go i go na i pinisim dispela wok long De bilong Krai Jisas. Filipai 1:6

Prea bilong ol stretpela man i gat bikpela strong na inap tru long helpim ol manmeri husat i no inap long helpim ol yet. Tru mipela i bin i go insait long sampela hevi insait long wok misin long yia i go pinis. Tasol prea bilong yupela olgeta Kristen i mekim na God i harim na i mekim olgeta wok i no bin pundaun insait long EBC PNG na ovasis misin tu.

God yet em i papa bilong gaden na em i bin lukautim gut ol wokman na ol wok i bin i go gut.

Tenkyu tru long prea bilong yupela na mipela i ken go on yet long prea inap tok bilong God i ken kisim strong long ol nupela ples.

IS TIMOR

Mipela i laik tok tenkyu na givim biknem long God, long wanem, God i save harim beten bilong yumi. Long las niusleta mipela i bin harim olsem Pasto Miquel husat i bin kisim trening long Mike i bin joinim wanpela misinari bilong Saut Korea na dispela i wok long bringim salens long sios bilong yumi long ples Borai.

God i helpim na ol brata i bin bung wantaim dispela misinari long Saut Korea na Pasto Miquel long stretim dispela hevi. Em ol brata Seng Eng,



Seng Eng

man i go pas long ogenaisesen yumi save wok bung wantaim long Is Timor ol i kolim CCI, wantaim brata Mike na lidasip bilong IPTL Sios. God i helpim tru dispela kongrigesen long Borai na sampela manmeri i kam bek gen long lotu.

Seng Eng i gat tingting long kam gen namba tu taim long kantri bilong yumi long mun Me 2019. Em i laik toktok long lidasip bilong EBC PNG long Mike na Mangen i ken go bek long Is Timor long helpim wok long hap. Na tu, em i kam bilong toktok wantaim ol lida long EBC PNG i ken

salim wanpela marit long go wok misin long Is Timor bipo long Mike



Mike na Mangan Kaire

i kam bek long PNG. I gat ol arapela tok tu long tingim bihain bilong sios bilong yumi na ogenaisesen bilong en long Is Timor (CCI).

NABIRE

Planti hevi i bin kamap long Sifu na famili taim ol i kam bek long ples. Ol i bin i go insait tru long ol dispela bikpela hevi. Tasol dispela ol hevi i bin strongim tru bilip laip bilong ol. Dua i no op yet long kisim visa long go bek long Nabire. Haus bilong ol i bin paia long wanpela pait na tu sampela famili bilong susa Baba i lusim laip long narapela pait. Klostu long pinis bilong 2018, Sifu famili i bin go stap long EBC Orobiga. Tenkyu tu long God i bin blesim ol famili wantaim wanpela pikinini boi. Nem bilong en Tifa. Long 2019, ol i lusim

Orobiga na muv i go long Kassam na brata Sifu bai kisim sampela trening long redim em yet na wet inap rot i op long wanpela hap long go mekim wok misin. Yumi ken prea long papa bilong gaden yet i ken opim wanpela dua long Sifu famili i ken kisim visa.



Famili Sifu

JOSEPH GARIMA FAMILI

Long dispela yia (2019), bai Brata Joseph i stat skul wantaim CLTC long Lae. Em bai stap yet long 6-Mile stesin na i go i kam long skul. Yumi ken stap baksait long en na prea inap God i ken strongim em na helpim em long ol stadi bilong em.

PNG INLAN WOK MISIN
Yumi laik tenkyu long God i wok long opim planti dua insait long kantri bilong yumi Papua Niugini. Prea planti tu long God i ken strongim ol bratasusa i lusim laip long mekim dispela wok.

Yumi ken tingim wok misin long Bougainville na prea long ol wokman na meri i stap long hap. Long wanem, long dispela yia bai i gat tok long ol i laik kisim independens. God i ken strongim ol Kristen tu long ol i ken lukluk long Jisas long dispela kain taim.

Yumi laik tingim yet sampela misin fil bilong yumi hia long Papua Niugini olsem; Green River, Manus, Samarai, Tari, Wabo, Kaintiba, Menyamya, Kikori na long wanwan seket tu.

Tenkyu tru long yupela olgeta i save tingim wok misin na sapot long bikpela na liklik rot tu. God bai i blesim yupela olgeta.



Misin Komiti

TENKYU POIN

- ☞ Tenkyu long God i givim bel isi long Sifu famili long taim bilong hevi.
- ☞ Tenkyu tu long God i blesim ol wantaim wanpela pikinini boi.
- ☞ Tenkyu long God i helpim na ol manmeri i kam gen long lotu long Borai.
- ☞ Tenkyu long God i bin lukautim, blesim na oraitim ol sik bilong ol wokmanmeri bilong en long wanwan misin fil.

ASKIM POIN

- ☞ Prea yet long visa bilong famili Sifu.
- ☞ Prea long visit bilong Seng Eng long Me 2019.
- ☞ Prea long God i ken singautim na makim wanpela famili long go mekim wok misin long Is Timor.
- ☞ Prea long wok patnasip bilong EBC PNG na CCI long Is Timor i ken kamap strong.
- ☞ Prea long toktok bilong independens long Bougainville inap ol Kristen i ken sanap strong long tok bilong God.
- ☞ Prea tu long God i ken helpim na strongim Misin komiti bilong EBC PNG.